

Uunga siunnersuut: 2021-mut aningaasanut inatsisissamut siunnersuutip, 2021-mut nuna tamakkerlugu akileraarutip aamma nuna tamakkerlugu immikkut akileraarutip akuersissutiginnissaanut killigitat sivitsorneqarnerat pillugit Inatsisartut inatsisaat nr. xx, xxx 2020-meersoq.

(Aningaasaqarnermut Naalakkersuisoq)

Saqqummiussissut

(Aningaasaqarnermut Naalakkersuisoq)

Siullermeerneqarnera

Aallaqqaammut Naalakkersuisut sinnerlugit, inatsisissatut siunnersuutip uuma tuaviortumik suliarineqarsinnaammat, Inatsisartut qutsaviginiarpakka.

Aningaasanut inatsisissatut siunnersuutip kinguartinneqarnerata kingorna, Inatsisartut Aningaasaqarnermut Akileraartarnermullu Ataatsimiititaliaq aningaasanut inatsisissap akuersissutigineqarnissaanut killigitat iluani suliarineqarnissaanut piffissakinnerulerput. Inatsisartut aningaasanut inatsisissatut siunnersuummik piffissaqarluarnerulluni suliaqarnissaa qulakkeerniarlugu, Inatsisartut Aningaasaqarnermut Akileraartarnermullu Ataatsimiititaliaat 2021-mut Aningaasanut Inatsisip akuersissutigineqarnissaanut killiliussap kinguartinneqarnissaa pillugu siunnersuummik saqqummiussinissaq pillugu saaffiginnippoq.

Inatsisartut Naalakkersuisullu pillugit Inatsisartut inatsisaanni, ukiumut tulliuuttumut aningaasanut inatsisissaq kingusinnerpaamik 15. november akuersissutigineqartassasoq allassimavoq. Aammattaaq Akileraartarnermut inatsimmi allassimavoq nuna tamakkerlugu akileraarutip aamma nuna tamakkerlugu immikkut akileraarutip procentii kingusinnerpaamik 15. november annertussusilerneqartassasut. Taassuma ukiumi tulliuuttumi Aningaasanut inatsimmut ilanngullugu pisarnera nalinginnaasuuvoq.

Inatsisissatut siunnersuutikkut siunertarinearpoq aningaasanut inatsisissap akuersissutigineqarnissaanut aamma nuna tamakkerlugu akileraarutip, aammalu nuna tamakkerlugu immikkut akileraarutip procentiinik annertussusiliinissamut piffissaliussap kingusinnerpaamik ulloq 27. novemberimut sivitsorneqarnissaa. Piffissaliussaq taamaaliornikkut ullut aqqaneq marlunnik sivitsorneqassaaq.

Ukiut siuliini piffissarititanik sivitsuisarnernik siunnersuutaasartunut sanilliullugu nutaatut siunnersuut nunatsinni kommunit 2021-mut kommuninut akileraarutininik missingersuutinillu kiisalu 2021-mi meeqqanut suli atualingitsunut kommunit ulluunerani neqeroorutaannik atuinermi akigititanut aalajangersaanissamut killiliussat sivitsorneqanngillat. Tassunga atatillugu killiliussat ulloq 1. decembarimut kiisalu novembarip naaneranut

inissinneqareersimanagerat, taamaalillunilu ukiumi kingusinnerusumeereernerat tunngavissaatinneqarpoq.

Taamaalilluni aamma Akileraartarnermut Aqutsisoqarfiup ilaatigut aningaasaqarnermut atortorissaarummik atulersitsiniarnerata maanna ingerlasup malitsigisaanik, kommuninut akileraarutit annertussusissaannik aalajangersaanissaq kinguartinneqassagaluarpat, skattekortinik aniatitsinissamut pilersaarusiornissaanik ajornakusoortitsisinnaanera aamma immikkut isiginiarneqarpoq.

Inatsisissatut siunnersuut ukiup naanerani atorunnaassaaq, tassalu 2020-innarmi atuutissallu-
ni.

Naalakkersuisut matumuuna siunnersuut Inatsisartunut kajumittumik suliassanngortippaat.